

**MALAYSIA**

**DEWAN RAKYAT**

**ATURAN URUSAN MESYUARAT**

**NASKHAH SAHIH/BAHASA MALAYSIA**

<http://www.parlimen.gov.my>

**HARI ISNIN, 2 NOVEMBER 2015, PUKUL 10.00 PAGI**

**Bil. 46**

---

**PERTANYAAN-PERTANYAAN BAGI JAWAB LISAN**

1. PR-1333-L70598  
**Datuk Haji Shabudin bin Yahaya [ Tasek Gelugor ]** minta **MENTERI KEWANGAN** menyatakan apakah pihak Kerajaan telah menjalankan statistik terkini dan kaji selidik terhadap keberkesanan pelaksanaan pemberian BR1M dalam menangani kos sara hidup yang semakin meningkat ini. Apakah terdapat kaedah lain yang boleh membantu rakyat dalam perkara ini.
2. PR-1333-L71471  
**Tuan Sim Chee Keong [ Bukit Mertajam ]** minta **PERDANA MENTERI** menyatakan kesan penurunan nilai Ringgit Malaysia terhadap pelajar-pelajar Malaysia di luar negara tajaan Kerajaan, sama ada melalui biasiswa ataupun pinjaman, serta langkah-langkah bantuan yang telah ataupun akan dilaksanakan.
3. PR-1333-L70696  
**Tuan Haji Hasbi bin Haji Habibollah [ Limbang ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan sejak 15 April 2015, berapakah bilangan peniaga-peniaga yang sudah diberi amaran, diambil tindakan dan didakwa di mahkamah di bawah Akta Kawalan Harga dan Antipencatutan 2011 sejak GST dilaksanakan di Limbang.
4. PR-1333-L71587  
**Puan Nurul Izzah binti Anwar [ Lembah Pantai ]** minta **MENTERI DALAM NEGERI** menyatakan :-
  - (a) apakah prosedur piawai serta tempoh masa yang diperlukan bagi mendapatkan perhatian kesihatan segera bagi tahanan penjara; dan
  - (b) mengapa pihak Kerajaan gagal memenuhi saranan doktor pakar untuk menjalankan fisioterapi intensif dan pembedahan bahu yang diperlukan oleh Dato' Seri Anwar Ibrahim.

5. PR-1333-L70570  
**Dato' Ahmad Fauzi bin Zahari [ Setiawangsa ]** minta **MENTERI SUMBER ASLI DAN ALAM SEKITAR** menyatakan apakah perancangan dan tindakan bersama Kerajaan Indonesia bagi mengatasi masalah jerebu yang berpunca daripada negara jiran tersebut saban tahun.
6. PR-1333-L69785  
**Puan Siti Zailah binti Mohd Yusoff [ Rantau Panjang ]** minta **MENTERI PERDAGANGAN ANTARABANGSA DAN INDUSTRI** menyatakan perkembangan projek Halal Hub di bawah ECER di Kelantan dan bilakah operasi sepenuhnya dapat dilaksanakan serta hasil pengeluarannya.
7. PR-1333-L69634  
**Tuan Khoo Soo Seang [ Tebrau ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan apakah langkah-langkah yang akan diambil oleh Kementerian terhadap peniaga-peniaga yang enggan menurunkan harga sedangkan kos pengeluaran semakin menurun seperti dicatatkan pada Penunjuk Harga Pengeluar yang diterbitkan oleh Jabatan Perangkaan Malaysia yang mana pada bulan April, Mei dan Jun 2015 telah turun sebanyak 5.9%, 6.3% dan 6.0%.
8. PR-1333-L70895  
**Tuan Loke Siew Fook [ Seremban ]** minta **PERDANA MENTERI** menyatakan status terkini pembinaan rumah untuk mangsa banjir di Kelantan termasuk jumlah yang telah siap dan diserahkan kepada mangsa, yang masih dalam pembinaan dan yang masih belum dimulakan serta sebab-sebab kelewatan pembinaan.
9. PR-1333-L69495  
**Dato' Sri Haji Abdul Azeez bin Abdul Rahim [ Baling ]** minta **MENTERI KEMAJUANLUAR BANDAR DAN WILAYAH** menyatakan apakah tindakan Kementerian dalam menyelesaikan masalah jambatan usang dan sempit terutamanya di kawasan luar bandar di mana jambatan-jambatan ini menjadi laluan utama kepada penduduk-penduduk seperti Jambatan Kuala Pegang di Parlimen Baling yang mana jambatan ini agak sempit dan mempunyai selekoh yang tajam dan merbahaya serta selalu menjadi kawasan kemalangan.
10. PR-1333-L69978  
**Dato' Dr. Mujahid Yusof Rawa [ Parit Buntar ]** minta **PERDANA MENTERI** menyatakan usaha untuk berhubung dengan semua entiti NGO bagi mewujudkan sebuah masyarakat madani yang memainkan peranan semakimbang kepada pemerintah secara berkesan.
11. PR-1333-L69735  
**Datuk Linda Tsen Thau Lin [ Batu Sapi ]** minta **MENTERI KEWANGAN** menyatakan tindakan yang akan diambil untuk mengurangkan kesan buruk kepada rakyat terutamanya yang bergantung kepada barang-barang dan perkhidmatan luar negara, akibat daripada kejatuhan nilai Ringgit Malaysia.

12. PR-1333-L70921  
**Puan Kasthuriraani a/p Patto [ Batu Kawan ]** minta **MENTERI PEMBANGUNAN WANITA, KELUARGA DAN MASYARAKAT** menyatakan sebab mengapa Malaysia telah membuat reservasi 5 perkara dalam Konvensyen Hak Kanak-kanak (Convention on the Rights of the Child) iaitu perkara 2, 7, 14, 28 (a) (1) dan 37 apabila menandatangani CRC pada 1995. Jika belum, bilakah Malaysia akan meratifikasi kelima-lima perkara ini.
13. PR-1333-L70946  
**Dato' Abd. Aziz bin Haji Sheikh Fadzir [ Kulim Bandar Baharu ]** minta **PERDANA MENTERI** menyatakan apakah peranan penubuhan Jawatankuasa Khas Ekonomi (JKE) dalam mengembalikan struktur ekonomi negara ke arah lebih baik dan adakah dengan penubuhan JKE ini akan lebih membantu memulihkan kejatuhan nilai ringgit yang berlaku kini serta bagaimanakah Jawatankuasa Khas Ekonomi (JKE) membantu mencari satu solusi yang lebih baik dalam meningkatkan taraf hidup masyarakat Malaysia di semua peringkat.
14. PR-1333-L71295  
**Tuan Mohamed Azmin bin Ali [ Gombak ]** minta **MENTERI KEWANGAN** menyatakan apakah strategi Bank Negara Malaysia (BNM) untuk berdepan dengan krisis kejatuhan nilai Ringgit yang semakin parah.
15. PR-1333-L70775  
**Puan Rubiah binti Haji Wang [ Kota Samarahan ]** minta **MENTERI KEWANGAN** menyatakan adakah terdapat unjuran pendapatan dari segi ekonomi negara selepas pelaksanaan GST dan apakah perancangan Kerajaan dalam menyampaikan maklumat yang tepat kepada pengguna secara berterusan terutamanya di kawasan luar bandar.
16. PR-1333-L70316  
**Dr. Tan Seng Giaw [ Kepong ]** minta **MENTERI WILAYAH PERSEKUTUAN** menyatakan bilangan unit dalam projek-projek perumahan yang dibina dan kriteria untuk memilih para pemohon
17. PR-1333-L71307  
**Datuk Wira Haji Ahmad bin Hamzah [ Jasin ]** minta **MENTERI LUAR NEGERI** menyatakan :-
- (a) berapa banyakkah rundingan dan perjanjian (*comprehensive agreements*) dua hala yang telah disepakati dan ditandatangani antara Malaysia dan USA bagi tempoh 2009-2014; dan
  - (b) bidang-bidang yang diliputi dan faedah-faedah yang telah dan bakal negara kita peroleh.
18. PR-1333-L71421  
**Tuan Ahmad Baihaki bin Atiqullah [ Kubang Kerian ]** minta **PERDANA MENTERI** menyatakan dalam memastikan pengurusan bencana seperti banjir besar dapat diuruskan dengan baik dan berkesan, apakah arahan 20 Majlis Keselamatan Negara (MKN) akan terus dipakai untuk bencana alam dan agensi manakah yang akan menjalankan operasi untuk pengurusan bencana terutama di negeri Kelantan pada tahun 2015.

19. PR-1333-L69716  
**Dato' Haji Mohd Zaim bin Abu Hasan [ Parit ]** minta **PERDANA MENTERI** menyatakan cadangan supaya Kerajaan mengkaji semula keperluan untuk menghidupkan kembali Akta Keselamatan Dalam Negeri yang dimansuhkan bagi mengatasi ancaman keselamatan dan ketenteraman awam yang semakin meningkat.
20. PR-1333-L70363  
**Tuan Wong Tien Fatt @ Wong Nyuk Foh [ Sandakan ]** minta **MENTERI PERTAHANAN** menyatakan langkah-langkah yang akan diambil oleh Kerajaan Malaysia untuk menjamin keselamatan negeri Sabah khususnya Pantai Timur Sabah jika peperangan sivil berlaku di Filipina.
21. PR-1333-L70215  
**Datuk Koh Nai Kwong [ Alor Gajah ]** minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kementerian akan mengkaji semula perundangan yang sedia ada bagi memperluaskan perlindungan kepada golongan wanita daripada gangguan seksual di luar tempat kerja atau tempat awam seperti LRT, bas dan sebagainya.
22. PR-1333-L69835  
**Tuan Lim Guan Eng [ Bagan ]** minta **MENTERI KEWANGAN** menyatakan sama ada Kerajaan akan mempertimbangkan semula had '*threshold*' jumlah jualan GST dinaikkan dari RM500,000 kepada RM2 juta setahun. Apakah sebabnya rebat GST yang dijanjikan untuk dikembalikan dalam masa 2 minggu tidak dilaksanakan. Apakah jumlah tunggakan rebat GST tersebut dan balasan kepada peniaga atas kelewatan ini.
23. PR-1333-L70709  
**Datuk Seri Noh bin Haji Omar [ Tanjong Karang ]** minta **MENTERI DALAM NEGERI** menyatakan berapa ramai rakyat Malaysia berumur lebih daripada 100 tahun berdasarkan rekod Jabatan Pendaftaran Negara mengikut pecahan kaum.
24. PR-1333-L70437  
**Tuan Wong Sze Phin @ Jimmy [ Kota Kinabalu ]** minta **PERDANA MENTERI** menyatakan semua projek infrastruktur yang telah dicadangkan dalam Rancangan Malaysia Ke-11 (RMK 11) misalnya sekolah, hospital, klinik, pengangkutan awam dan sebagainya di Kota Kinabalu. Berikan anggaran peruntukan bagi projek tersebut.
25. PR-1333-L70500  
**Datuk William @ Nyallau anak Badak [ Lubok Antu ]** minta **MENTERI PENGANGKUTAN** menyatakan adakah pihak Kementerian mempunyai cadangan untuk membina pelabuhan darat di sempadan Lubok Antu, Malaysia dengan Badau, Kalimantan Barat Indonesia, memandangkan begitu banyak sekali lori-lori membawa masuk CPO dari Kalimantan melintasi sempadan tersebut.

26. PR-1333-L71348  
**Dr. Mohd Hatta bin Md. Ramli [ Kuala Krai ]** minta **MENTERI DALAM NEGERI** menyatakan apakah langkah-langkah yang dibuat bagi menjaga keselamatan kakitangan berkaitan pelaksanaan undang-undang seperti pihak pendakwa raya dan majistret yang terdedah kepada pelbagai risiko keselamatan diri.
27. PR-1333-L70992  
**Dato' Ir. Haji Nawawi bin Ahmad [ Langkawi ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan di Langkawi hanya terdapat 1 buah balai bomba iaitu di Kuah, apakah kerajaan bercadang untuk menambah pembinaan sebuah lagi balai bomba di Langkawi, terutamanya di kawasan Pantai Cenang atau Padang Matsirat.
28. PR-1333-L71085  
**Tuan V. Sivakumar [ Batu Gajah ]** minta **MENTERI KEWANGAN** menyatakan jumlah rumah yang telah dilelong oleh bank-bank di negara kita dari tahun 2006 sehingga Ogos 2015 kerana pemilik rumah tidak mampu membayar pinjaman. Apakah langkah-langkah yang diambil oleh Kerajaan untuk mengawal dan mengatasi fenomena yang merugikan ini.
29. PR-1333-L71363  
**Tuan Ignatius Dorell Leiking [ Penampang ]** minta **MENTERI TENAGA, TEKNOLOGI HIJAU DAN AIR** menyatakan statistik kekerapan gangguan bekalan elektrik di seluruh Sabah sejak Januari 2013 hingga Julai 2015 yang berpunca ataupun disebabkan oleh cuaca buruk/ribut dan apakah langkah-langkah yang telah diambil oleh SESB untuk mengatasi masalah tersebut.
30. PR-1333-L71452  
**Dr. Hajah Siti Mariah binti Mahmud [ Kota Raja ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan jumlah pemaju perumahan yang terbengkalai yang telah diambil tindakan undang-undang mengikut Akta 118 (Akta Pemajuan Perumahan Kawalan dan Perlesenan) dan apakah penambahbaikan yang akan atau telah dibuat oleh Menteri untuk memastikan tidak berlaku projek perumahan yang terbengkalai.
31. PR-1333-L71406  
**Dato' Seri Abdul Hadi bin Awang [ Marang ]** minta **PERDANA MENTERI** menyatakan apakah justifikasi Lembaga Zakat mengurangkan agihan zakat kepada program pembangunan ekonomi yang memberi modal perniagaan kepada asnaf.
32. PR-1333-L70863  
**Tuan Chong Chieng Jen [ Bandar Kuching ]** minta **KEMAJUAN LUAR BANDAR DAN WILAYAH** menyatakan sejak 10 tahun lalu, berapakah ramai pelajar yang telah dibiayai oleh MARA untuk belajar di luar negara mengikut negara destinasi mereka dan berapa daripadanya adalah pelajar dari Sarawak dan apakah pecahan kaum mereka itu.

33. PR-1333-L71358  
**Dato' Sri Hasan bin Malek [ Kuala Pilah ]** minta **MENTERI PELANCONGAN DAN KEBUDAYAAN** menyatakan adakah terdapat sebarang kajian oleh pihak Kementerian tentang impak pola tabiat pembacaan bahan bercetak di kalangan generasi muda di Malaysia yang semakin menampakkan penyusutan dan seterusnya lenyap. Adakah pihak Kementerian bercadang untuk melaksanakan satu kempen peringkat nasional bagi meningkatkan dan menggalakkan tabiat membaca bahan bercetak di kalangan rakyat Malaysia.
34. PR-1333-L70676  
**Tuan Tony Pua Kiam Wee [ Petaling Jaya Utara ]** minta **MENTERI KEWANGAN** menyatakan sama ada Minister of Finance Inc (MOF) merupakan pihak kepada perjanjian antara 1MDB dengan IPIC pada 28 Mei 2015. Adakah MOF akan terpaksa membayar ganti rugi kepada IPIC jika 1MDB gagal menyerahkan aset bernilai sekurang-kurangnya US\$1 bilion pada 30 Jun 2016.
35. PR-1333-L70409  
**Puan Teresa Kok Suh Sim [ Seputeh ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan bilangan lesen pemaju yang dibeku dan digantungkan oleh Kementerian. Sila nyatakan sebab penggantungan ataupun pembekuan lesen yang dikenakan terhadap setiap syarikat pemaju sejak bulan Jun 2013 sehingga hari ini.
36. PR-1333-L71008  
**Tuan R. Sivarasa [ Subang ]** minta **MENTERI PENGANGKUTAN** menyatakan sebab kita membuat pengumuman pengesahan serpihan-serpihan yang ditemui di Pulau Reunion sebagai sebahagian pesawat MH370 sebelum apa-apa pengesahan daripada pakar-pakar Syarikat Boeing di Perancis dan negara-negara lain.
37. PR-1333-L69928  
**Dato' Dr. Tan Kee Kwong [ Wangsa Maju ]** minta **MENTERI SUMBER ASLI DAN ALAM SEKITAR** menyatakan adakah terdapat sebarang tindakan terhadap Indonesia akibat dari jerebu teruk yang melanda negara pada September lalu.
38. PR-1333-L70646  
**Dr. Ko Chung Sen [ Kampar ]** minta **MENTERI KEWANGAN** menyatakan :-
- (a) kesan daripada harga minyak yang rendah dalam mengurangkan KDNK ekonomi Malaysia; dan
  - (b) jangkaan keuntungan Petronas untuk tahun ini dan 5 tahun akan datang, dan jumlah dividen dan cukai yang akan dikutip daripada Petronas bagi tahun ini dan 5 tahun akan datang, dan jumlah kerugian hasil dialami aktiviti berkaitan minyak kepada Kerajaan.
39. PR-1333-L71115  
**Tuan Jeff Ooi Chuan Aun [ Jelutong ]** minta **MENTERI KEWANGAN** menyatakan bagaimana TNB dapat menangani risikonya dalam usaha menjana bon korporat menerusi sukuk sebanyak RM10 bilion bagi Projek Jimah Power memandangkan penjualan sukuk telah jatuh sebanyak 37% berbanding tahun lalu.

40. PR-1333-L70287  
**Dato' Fauzi bin Abdul Rahman [ Indera Mahkota ]** minta **PERDANA MENTERI** menyatakan sama ada Kerajaan bersedia menzahirkan satu Majlis Ulama Negara yang dianggotai daripada seluas-luas lapangan ulama tempatan dan luar negara yang ditugaskan memberi nasihat tertentu sejajar dengan Islam sebagai agama rasmi Persekutuan.
41. PR-1333-L71557  
**Tuan Haji Mohd Fasih bin Haji Mohd Fakeh [ Sabak Bernam ]** minta **MENTERI KEWANGAN** menyatakan sejauh manakah penurunan nilai ringgit berbanding dollar Amerika Syarikat (AS) kepada paras terendah memberi impak kepada keseluruhan rakyat terutama golongan berpendapatan sederhana dan pelbagai jenis perniagaan dalam negara serta langkah Kerajaan bagi menangani isu kejatuhan ringgit supaya tidak membebankan rakyat.
42. PR-1333-L71440  
**Tuan Tan Kok Wai [ Cheras ]** minta **MENTERI KEWANGAN** menyatakan kesan penyusutan nilai ringgit terhadap ekonomi negara dan isi rumah terutamanya golongan 40% terendah daripada segi kuasa berbelanja dan pendapatan. Apakah langkah yang diambil untuk menstabilkan ringgit dan mengekalkan daya saing dalam pasaran global.
43. PR-1333-L71238  
**Tuan Oscar Ling Chai Yew [ Sibu ]** minta **MENTERI KESIHATAN** menyatakan poliklinik di Sibu masih menghadapi masalah kekurangan kakitangan mengakibatkan pesakit-pesakit harus menunggu dengan masa yang panjang. Apakah langkah yang diambil untuk menyelesaikan masalah di Poliklinik Oya dan Poliklinik Lanang Sibu.
44. PR-1333-L70108  
**Tuan Nik Mohamad Abduh bin Nik Abdul Aziz [ Pasir Mas ]** minta **MENTERI BELIA DAN SUKAN** menyatakan perancangan Kementerian bagi meningkatkan pendedahan belia kepada ekonomi dan politik yang menunjukkan skor rendah dalam Indeks Belia Malaysia 2015.
45. PR-1333-L70174  
**Dato' Dr. Nik Mazlan bin Nik Mohamad [ Pasir Puteh ]** minta **MENTERI PENDIDIKAN** menyatakan adakah pihak Kementerian bercadang untuk membina sekolah menengah agama berasrama penuh di daerah Pasir Puteh memandangkan kepada tapak cadangan sekolah telah diambil-milik oleh Kerajaan.
46. PR-1333-L70652  
**Dr. Ko Chung Sen [ Kampar ]** minta **PERDANA MENTERI** menyatakan :-
- (a) jumlah wang yang akan disuntik oleh PNB, Khazanah dan KWAP untuk membiayai dana RM20 bilion ValueCap; dan
  - (b) sama ada dana ini akan diperolehi daripada pinjaman atau daripada rizab tunai masing-masing institusi tersebut, dan sama ada dana atau pinjaman yang diberi ini akan dijamin oleh Kerajaan.

47. PR-1333-L70123  
**Tuan Haji Nasrudin bin Hassan [ Temerloh ]** minta **PERDANA MENTERI** menyatakan jenis-jenis bantuan yang telah dihulurkan kepada para pelajar Malaysia di luar negara yang terjejas dengan kejatuhan nilai ringgit.
48. PR-1333-L71254  
**Dato' Seri Tiong King Sing [ Bintulu ]** minta **MENTERI KEMAJUAN LUAR BANDAR DAN WILAYAH** menyatakan :-
- (a) berapakah jumlah projek terbengkalai di bawah Kementerian khasnya projek bekalan elektrik dan air di negeri Sarawak terutamanya Bintulu dan apakah perancangan Kementerian untuk menyempurnakan projek tersebut dan bila; dan
  - (b) apakah piawaian dan spesifikasi yang ditetapkan oleh pihak Kementerian dalam membina jalan raya di kawasan luar bandar.
49. PR-1333-L70145  
**Tuan Wan Hasan bin Mohd Ramli [ Dungun ]** minta **PERDANA MENTERI** menyatakan apakah hasil siasatan SPRM yang mengiktiraf RM2.6 bilion sebagai derma, sumber perolehan wang tersebut serta bagaimanakah ianya dibelanjakan.
50. PR-1333-L70649  
**Dr. Ko Chung Sen [ Kampar ]** minta **PERDANA MENTERI** menyatakan :-
- (a) sama ada Bank Negara menyedari tentang pemindahan RM2.6 bilion ke dalam akaun peribadi Perdana Menteri dan siapa pembayarnya; dan
  - (b) sama ada Bank Negara menyedari tentang pemindahan keluar wang daripada akaun peribadi Perdana Menteri dan siapakah penerimanya, dan sama ada pemindahan-pemindahan ini telah diteliti oleh Bank Negara dan SPRM untuk mengesahkan tidak ada unsur rasuah atau pengubahan wang haram.
51. PR-1333-L70947  
**Tuan Ramkarpal Singh a/l Karpal Singh [ Bukit Gelugor ]** minta **PERDANA MENTERI** menyatakan sumber dari mana datangnya dana berjumlah lebih kurang RM2.6 bilion yang dikatakan didepositkan ke dalam akaun peribadi YAB. Perdana Menteri sepertimana yang dilaporkan oleh akhbar Wall Street Journal pada Julai 2015.
52. PR-1333-L69811  
**Dato' Haji Mahfuz bin Omar [ Pokok Sena ]** minta **PERDANA MENTERI** menyatakan apakah status dan hasil siasatan SPRM ke atas isu yang didakwa sejumlah wang RM2.67 bilion telah dimasukkan ke dalam akaun peribadi Datuk Seri Najib di AmBank dan adakah RM40 juta daripadanya disalurkan dari SRC Internasional Sdn. Bhd., anak syarikat 1MDB.



**ATURAN URUSAN MESYUARAT DAN USUL-USUL**

1. (D.R. 31/2015) Rang Undang-undang Perbekalan 2016 - **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang” (29 Oktober 2015)**

**[ Menteri Kewangan ]**

**DAN**

**Usul dibuat oleh YAB Menteri Kewangan dan masalah dicadangkan :-**

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari lima puluh dua bilion ringgit (RM52,000,000,000) dibelanjakan daripada Kumpulan Wang Pembangunan bagi tahun 2016, dan bagi tujuan dan butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2016, yang dibentangkan sebagai Kertas Perintah 42 Tahun 2015, adalah diuntukkan di bawah Maksud-maksud yang berkenaan jumlah-jumlah yang bersetentangan dengan butiran-butiran itu di ruangan enam dan tujuh senarai tersebut.”

**Menyambung semula Perbahasan atas masalah (29 Oktober, 2015)**

2. (D.R. 32/2015) Rang Undang-undang Kewangan 2015 **Bacaan Kali Yang Kedua**  
**[ Menteri Kewangan ]**
3. (D.R. 28/2015) Rang Undang-undang Perbadanan Insurans Deposit Malaysia (Pindaan) 2015 - **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang” (22 Oktober 2015)**  
**[ Menteri Kewangan ]**
4. (D.R. 30/2015) Rang Undang-undang Syarikat 2015 **Bacaan Kali Yang Kedua**  
**[ Menteri Perdagangan Dalam Negeri, Koperasi dan Kepenggunaan ]**

5. (D.R. 29/2015) Rang Undang-undang Skim Kepentingan 2015. “  
  
**[ Menteri Perdagangan Dalam Negeri,  
Koperasi dan Kepenggunaan ]**
6. (D.R. 9/2015) Rang Undang-undang Kanun Tatacara Jenayah (Pindaan) 2015 “  
  
**[ Menteri Dalam Negeri ]**
7. (D.R. 12/2015) Rang Undang-undang Keterangan (Pindaan) 2015 “  
  
**[ Menteri di Jabatan Perdana Menteri ]**
8. (D.R. 24/2014) Rang Undang-undang Dadah Berbahaya (Pindaan) (No. 2) 2014 “  
  
**[ Menteri Kesihatan ]**

9. PR-1333-U69963  
**Datuk Dr. Makin @ Marcus Mojigoh [ Putatan ]** akan mencadangkan:-

“Bahawa Dewan ini mengambil maklum bahawa sejak akhir-akhir ini, dan Gerakan Sabah-Sarawak keluar Malaysia (SSKM) kian mendapat perhatian dan sokongan dari sebilangan kecil rakyat dari kedua-dua negeri ini. Bahawa Dewan ini mengambil maklum bahawa, terdapat rungutan-rungutan di kalangan rakyat negeri Sabah dan Sarawak dalam beberapa isu yang mereka fikirkan bahawa hak mereka, seperti yang dijanjikan dan terkandung dalam Perjanjian Malaysia 1963 telah dicabuli atau tidak ditunaikan. Dan mengambil maklum juga, antara isu utama yang disuarakan dalam rungutan ini adalah banjir pendatang asing ke negeri Sabah dan di tambah buruk pula dengan pemberian status warga Negara kepada mereka ini. Dan mengambil maklum juga bahawa, setiap kali isu 20 perkara (bagi Negeri Sabah) dan 16 perkara (bagi Negeri Sarawak) dalam Perjanjian Malaysia ini disuarakan, terdapat usaha-usaha pihak tertentu untuk mensenyapkan isu ini dan akhirnya rungutan-rungutan ini menjadi satu gerakan ketidakpuasan hati rakyat. Dan mengambil maklum juga bahawa, gerakan ketidakpuasan hati rakyat ini telah sampai satu tahap di mana mereka secara terbuka mengelarkan diri mereka sebagai aktivis Sabah-Sarawak keluar Malaysia atau ringkasnya SSKM. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Kita maklum bahawa, mengambil tindakan Undang-undang semata-mata untuk menghalang mereka ini bagi menyuarakan rungutan mereka ini tidak akan menyelesaikan isu yang ditimbulkan, malah akan merumitkan keadaan lagi di mana mereka akan semakin mendapat simpati daripada kalangan rakyat yang lainnya sementara Kerajaan pula dianggap sebagai tidak perihatin dan kuku besi.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka yang menggelarkan diri mereka sebagai SSKM ini.”

**[ Menteri Dalam Negeri ]**

10. PR-1333-U69964

**Datuk Dr. Makin @ Marcus Mojigoh [ Putatan ]** akan mencadangkan:-

“Bahawa Dewan ini mengambil maklum bahawa, terdapat rungutan-rungutan dikalangan rakyat bahawa sejak akhir-akhir ini, perpaduan, keharmonian, kesejahteraan dan kerjasama antara rakyat negara ini yang terdiri dari berbilang kaum dan agama telah terhakis. Dan mengambil maklum juga, antara isu utama menyebabkan perkara ini berlaku kerana terdapat golongan tertentu yang memainkan isu bangsa dan agama sewenang-wenangnya serta rakyat merasakan tidak ada tindakan tegas yang diambil bagi menangani masalah ini. Dan mengambil maklum juga bahawa, Perhimpunan Bersih 4 dan Perhimpunan Rakyat Bersatu baru-baru ini telah menanamkan bibit kebencian serta syak wasangka antara kaum di negara ini. Dan mengambil maklum juga bahawa, Rukun Negara sebagai tonggak perpaduan, keharmonian, kesejahteraan dan kerjasama antara rakyat negara ini secara tidak langsung tidak lagi dihormati dan dipatuhi. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka ini. Kerajaan juga hendaklah menguatkuasakan segala peruntukan Undang-undang yang ada bagi menghalang mana-mana demokrasi atau perjumpaan umum yang membangkitkan isu bangsa dan agama, yang boleh menggugat perpaduan, keharmonian, kesejahteraan dan kerjasama antara rakyat negara ini.”

**[ Perdana Menteri ]**

11. PR-1333-U69965

**Datuk Dr. Makin @ Marcus Mojigoh [ Putatan ]** akan mencadangkan:-

“Bahawa Dewan ini mengambil maklum bahawa, terdapat laporan mengatakan bahawa operasi bot lautan dalam yang beroperasi di negara ini tidak mendatangkan faedah kepada negara ini secara total. Dan mengambil maklum juga, antara isu utama yang disuarakan dalam laporan ini adalah, para pengusaha bot lautan dalam ini menjual minyak diesel bersubsidi kepada bot-bot asing. Dan mengambil maklum bahawa, terdapat juga laporan bahawa tangkapan bot lautan dalam ini dijual kepada nelayan asing yang menawarkan harga yang lebih baik. Dan mengambil maklum juga bahawa, kedua-dua aktiviti yang disebutkan ini telah mendatangkan kerugian yang besar kepada negara ini, sama ada dari segi subsidi diesel mahupun dari segi tangkapan hasil lautan di negara ini dijual ke negara asing.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu sistem kawalan yang bersepadu bagi memastikan bahawa semua diesel bersubsidi digunakan dengan niat asal serta tangkapan tersebut hendaklah dipasarkan di negara ini.”

**[ Menteri Pertanian dan Industri Asas Tani ]**

12. PR-1333-U69966

**Datuk Dr. Makin @ Marcus Mojigoh [ Putatan ]** akan mencadangkan:-

“Bahawa Dewan ini mengambil maklum bahawa, isu 1MDB telah mencemarkan nama baik Kerajaan dan Negara Malaysia pada umumnya. Dan mengambil maklum juga, isu 1MDB telah sedikit sebanyak menghakis kepercayaan pelabur asing kepada Sistem Pelaburan di Negara ini. Dan mengambil maklum juga bahawa, isu 1MDB telah disensasikan melalui media sosial, media elektronik dan media asing dengan sewenang-wenangnya yang menggambarkan bahawa syarikat milik Kerajaan ini hampir muflis dan liabilitinya perlu ditanggung oleh Kerajaan. Dan mengambil maklum juga bahawa, hasil daripada kemuskilan ini, rakyat pada umumnya mempersoalkan cara kerja Kerajaan mentadbir 1MDB sehingga mengalami kerugian yang besar dan terpaksa menanggung liability 1MDB. Maka, bagi menangani masalah ini, Dewan Yang Mulia ini hendaklah mengambil ketetapan bahawa, Kerajaan hendaklah memperjelaskan secara terperinci mengenai model perniagaan 1MDB kepada umum agar satu gambaran yang telus dapat mereka perolehi serta mengembalikan kebolehpercayaan rakyat kepada Kerajaan masa kini.”

**[ Menteri Kewangan ]**

13. PR-1333-U70485

**Tuan Ng Wei Aik [ Tanjong ]** akan mencadangkan:-

“Bahawa Dewan Rakyat ini mengambil ketetapan untuk mengutuk Perhimpunan Rakyat Bersatu yang diadakan pada 16 September 2015 yang sifatnya berbau perkauman serta bertujuan mengapi-apikan sentimen perkauman, termasuk menuntut supaya sekolah-sekolah Cina ditutup, menggelar anggota-anggota polis yang bertugas sebagai “barua Cina”, cuba menimbulkan kekecohan di Jalan Petaling serta mempersoalkan keperluan “Little India” diwujudkan dan tindakan-tindakan yang sewajarnya harus diambil terhadap pihak penganjur dan pihak-pihak yang harus bertanggungjawab.”

**[ Menteri Dalam Negeri ]**

14. PR-1333-U70272

**Tuan M. Kulasegaran [ Ipoh Barat ]** akan mencadangkan:-

“Bahawa Dewan ini mengambil maklum demi kepentingan negara dan masyarakat sejagat pandangan serius terhadap kestabilan ekonomi dan kemajuan negara harus diberi perhatian sepenuhnya. Oleh yang demikian Dewan ini perlu mengambil maklum mengenai perkara ini dan mengarahkan Kerajaan untuk mengatasi masalah ini.”

**[ Perdana Menteri ]**

15. PR-1333-U70255

**Dr. Tan Seng Giaw [ Kepong ]** akan mencadangkan:-

“Bahawa Menteri Kewangan membincangkan cara-cara yang diambil untuk mempertahankan nilai ringgit.”

**[ Menteri Kewangan ]**

16. PR-1333-U70256

**Dr. Tan Seng Giaw [ Kepong ]** akan mencadangkan:-

“Bahawa Menteri Sumber Asli dan Alam Sekitar mendebatkan masalah jerebu di rantau in.”

**[ Menteri Sumber Asli dan Alam Sekitar ]**

17. PR-1333-U71552

**Tuan Fong Kui Lun [ Bukit Bintang ]** akan mencadangkan:-

“Bahawa Kerajaan mempergiatkan usaha untuk menyatu padukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 58 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia.”

**[ Perdana Menteri ]**

18. PR-1333-U71553

**Tuan Fong Kui Lun [ Bukit Bintang ]** akan mencadangkan:-

“Bahawa Kerajaan memulihkan pilihan raya Kerajaan Tempatan seluruh negara supaya urus tadbir Kerajaan menjadi cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat.”

**[ Menteri Kesejahteraan Bandar, Perumahan dan Kerajaan Tempatan ]**

19. PR-1333-U69805

**Dato' Kamarudin bin Jaffar [ Tumpat ]** akan mencadangkan:-

“Bahawa Dewan ini memutuskan untuk Malaysia menerima masuk, memberi perlindungan dan akhirnya memberikan taraf kewarganegaraan kepada 1000,000 orang rakyat negara Syria daripada jutaan orang yang sekarang menjadi pelarian di Turki dan Eropah.”

**[ Perdana Menteri ]**

20. PR-1333-U69806

**Dato' Kamarudin bin Jaffar [ Tumpat ]** akan mencadangkan:-

“Bahawa Dewan ini merakamkan perasaan sedih dan kecewa bahawa perjalanan kerja-kerja Jawatankuasa Kira-kira Wang Negara (PAC) telah tergendala oleh beberapa sebab dan dengan ini memutuskan untuk meminta Tuan Yang di Pertua Dewan Rakyat dengan segera melicinkan semula perjalanan Jawatankuasa itu.”

**[ Perdana Menteri ]**

21. PR-1333-U69807

**Dato' Kamarudin bin Jaffar [ Tumpat ]** akan mencadangkan:-

“Bahawa Dewan ini amat tidak berpuas hati dengan kemajuan pembinaan rumah-rumah untuk mangsa banjir negeri Kelantan. Oleh itu Dewan ini mendesak Kerajaan Pusat berusaha dengan lebih gigih lagi bersama dengan Kerajaan Negeri Kelantan untuk melipatkali ganda usaha pembinaan rumah-rumah tersebut.”

**[ Perdana Menteri ]**

22. PR-1333-U70769

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, hubungan antara kaum mutakhir ini makin meruncing dan jika tidak dibendung akan mencapai tahap amat merbahaya dan akibatnya negara akan hancur seperti yang terjadi di negara-negara lain yang sedang bergolak akibat isu perkauman. Bila rakyat Malaysia berbangsa Dayak, Kadazan, Orang Asal, Cina, Melayu, Jawa, Bugis atau apa suku kaum sekalipun mengkritik dan mempersoalkan hal tatakelola Negara dan kepimpinan Perdana Menteri dan Kabinetnya, rakyat tidak mempersoalkan ras Perdana Menteri. Rakyat mempersoal Perdana Menteri atas kapasiti beliau sebagai Ketua Eksekutif Negara. BERSIH 4.0 menganjurkan demo jalanan kerana mendesak Perdana Menteri memberi jawapan kepada banyak persoalan yang tidak terjawab.

Soal 1MDB, Derma RM 2.6 bilion, Pertukaran Pegawai-pegawai SPRM, Penamatan khidmat Tan Sri Gani Patail sebagai Pendakwa Raya, pembebasan Abdul Razak Baginda yang rapat dengan Perdana Menteri dalam kes pembunuhan Altantuya Shaaribuu yang amat memalukan negara dan banyak lagi isu yang amat-amat mendesak yang tidak dijawab oleh Perdana Menteri secara meyakinkan. Untuk itu Kerajaan mesti membezakan mengkritik Perdana Menteri bukan mengkritik bangsa Perdana Menteri tetapi kerana Perdana Menteri adalah Ketua Eksekutif Negara yang sememangnya boleh dikritik yang dibenarkan oleh sistem pemerintahan yang diamalkan di negara ini.”

**[ Perdana Menteri ]**

23. PR-1333-U70770

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, bila UMNO dan NGO yang menyokong UMNO menganjurkan demo jalanan bertemakan Himpunan Maruah Melayu pada 16 September 2015 yang kemarahan disasarkan kepada rakyat kaum Cina, yang dikatakan mendominasi Himpunan BERSIH 4.0 pada 29 dan 30 Ogos 2015, penganjur memilih kaum Cina sebagai fokus serangan. Penganjur membawa posters dan banners tertulis kata-kata provokasi dan perkauman yang amat merbahaya seperti “Ini Tanah Melayu, Cina boleh keluar”. “Bawa parang dan keris. Tetak Cina. Umno perlukan anda”.

Sedangkan yang keluar dijalanan pada 29 dan 30 Ogos 2015 rakyat dari berbagai kaum termasuk Melayu dan Bumiputra yang lain. Kaum lain selain Cina juga menyuarakan perasaan tidak puas hati mereka terhadap Perdana Menteri. Di mana yang dikatakan Cina menghina Melayu dan Maruah Melayu dicabar. Kerajaan mesti berjiwa besar. Walaupun Kerajaan Barisan Nasional diterajui oleh UMNO dan Melayu tetapi rakyat negara ini terdiri dari berbagai bangsa yang wajib dilindungi dan dihormati.”

**[ Perdana Menteri ]**

24. PR-1333-U70772

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, penyakit Denggi akibat jangkitan nyamuk di Malaysia telah mencapai satu tahap yang merbahaya. Lebih parah kematian akibat penyakit ini sudah diterima sebagai satu yang lumrah dan tidak ada rasa bersalah oleh pemerintah. Kerajaan sepatutnya menubuhkan satu institusi khas bagi melawan wabak ini dengan memberikan peruntukan kewangan yang secukupnya serta membekalkan berbagai pakar bagi menjadikan institusi ini betul-betul memberi tumpukan dan perhatian kepada masalah yang begitu lama tidak dapat diselesaikan. Malaysia mesti memainkan peranan utama dan boleh menjadi juara dalam memerangi penyakit ini bukan sahaja di rantau ini malah di dunia. Kerajaan mesti serius dan komited dalam hal ini.”

**[ Menteri Kesihatan ]**

25. PR-1333-U70774

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, Kementerian Belia dan Sukan banyak memberi tumpuan kepada pembangunan sukan tetapi meninggalkan pembangunan belia di belakang. Setiap tahun ribuan anak-anak Malaysia yang keluar dari sekolah dan ramai yang tidak melanjutkan pelajaran ke pengajian tinggi atas berbagai sebab dan alasan. Akibat tidak ada program wajib yang mesti diikuti dan disertai oleh mereka, mereka menjadi satu eset yang amat bernilai yang terbiar dan tidak dimanfaatkan sepenuhnya. Adalah dicadangkan anak-anak ini, didaftarkan dan diwajibkan menyertai Khidmat negara selama dua tahun seperti yang dilakukan dikebanyakkan negara. Semasa dalam program ini, pilih dua atau tiga bidang ilmu yang boleh memberi menafaat berterusan bila mereka tamat program nanti. Sebagai contoh, ilmu motor mekanik dan elektrik. Selepas dua tahun mereka boleh berdikari dan bantuan susulan boleh diusahakan. Untuk memastikan program ini berjaya ianya mesti dilaksanakan sebagai program wajib dan dikembangkan dengan elemen ketenteraan.”

**[ Menteri Belia dan Sukan ]**

26. PR-1333-U70776

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, kegiatan merempit oleh anak-anak muda khasnya anak Melayu amat memalukan bangsa dan Kerajaan. Kerajaan seolah-oleh tidak ada jawapan pada permasalahan ini. Mereka yang merempit bukan sahaja membahayakan nyawa mereka juga nyawa orang awam. Adalah dicadangkan pihak polis menggunakan anggota Cawangan Khas bagi meninjau dan kenal pasti ketua kumpulan ini dan menahan mereka atas undang-undang yang sedia ada. Penahanan mereka hendaklah dihebahkan dalam akhbar dan media elektronik. Menahan mereka untuk beberapa malam di lokap dan jika ada bukti yang cukup mendakwa mereka di mahkamah akan menghantar mesej yang jelas bahawa kegiatan mereka amat merbahaya dan amat dibenci oleh masyarakat. Ini mesti dilakukan secara konsisten bukan berkala.”

**[ Menteri Dalam Negeri ]**

27. PR-1333-U71195

**Tuan Hee Loy Sian [ Petaling Jaya Selatan ]** akan mencadangkan:-

“Bahawa Dewan ini mengemukakan Undi Tidak Percaya terhadap Perdana Menteri Datuk Seri Najib Tun Razak atas alasan penerimaan “Wang Derma” berjumlah RM2.6 billion yang pada mulanya dinafikan, kemudiannya mengugut untuk menyaman akhbar Wall Street Journal dan akhirnya mengakui wang tersebut diperolehi daripada individu yang berasal dari Timur Tengah.



Dengan tidak menjelaskan mengapa “Wang Derma” ini dimasukkan ke akaun peribadi dan bukan atas nama parti, Dewan juga tidak berpuas hati ke atas siasatan skandal 1MDB yang berlaku di mana “Special Task Force” yang sepatutnya menyiasat skandal ini dibubarkan tanpa memberi sebarang alasan sehingga Peguam Negara Tan Sri Abdul Gani Patail ditamatkan perkhidmatan, pegawai SPRM dipindahkan, pihak polis mengganggu siasatan SPRM dan Bank Negara, Public Account Committee (PAC) yang sedang menjalankan siasatan terhadap kes 1MDB tidak berfungsi akibat daripada empat anggota PAC yang terbabit telah dilantik menjadi Menteri atau Timbalan Menteri oleh Perdana Menteri, Pengarah Cawangan Khas (SB) diberhentikan, Timbalan Pengarah Cawangan Khas dipindahkan ke Jabatan Perdana Menteri tanpa diberi tugasan. Disebabkan masalah yang dinyatakan, Perdana Menteri Datuk Seri Najib Tun Razak telah menjejaskan imej Negara di dunia dan menyebabkan pelabur tidak yakin terhadap Kerajaan sekarang sehingga ekonomi menjadi tidak stabil, serta pasaran saham menjunam teruk dan kejatuhan nilai wang ringgit Malaysia berbanding dengan dolar Amerika Syarikat. Maka rakyat Malaysia tidak lagi percaya terhadap Perdana Menteri dan dengan ini Dewan hendaklah mengambil ketetapan untuk mengemukakan Undi Tidak Percaya terhadap Perdana Menteri.”

**[ Perdana Menteri ]**

28. PR-1333-U70806

**Tuan Manivanan a/l Gowindasamy [ Kapar ]** akan mencadangkan:-

“Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gegaja pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu dketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama.”

**[ Menteri Kesejahteraan Bandar, Perumahan dan Kerajaan Tempatan ]**

29. PR-1333-U70808

**Tuan Manivanan a/l Gowindasamy [ Kapar ]** akan mencadangkan:-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan.”

**[ Menteri Dalam Negeri ]**

30. PR-1333-U70809

**Tuan Manivanan a/l Gowindasamy [ Kapar ]** akan mencadangkan:-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia.”

**[ Menteri Pendidikan ]**

**RISALAT-RISALAT YANG DIBAWA KE DALAM MESYUARAT**  
**(DEWAN RAKYAT)**

<b><u>TAHUN</u></b> <b><u>2015</u></b>	<b><u>RISALAT/DOKUMEN</u></b>	<b><u>TARIKH</u></b> <b><u>DIBENTANGKAN</u></b>
ST.103	Laporan Tahunan dan Penyata Kewangan Majlis Peperiksaan Malaysia Bagi Tahun 2014.	2 November 2015